

23.
29

HARVARD COLLEGE LIBRARY
FROM THE
HARVARD-YENCHING
INSTITUTE
SEP 30 1929

70

Ch L 5570.2928

T 5237.7.2928

明詩綜卷七十

小長蘆 朱彝尊

錄

越來 徐如玉 緝評

吳惟英 二首

惟英字國華襲恭順侯爵有墨響齋集

靜志居詩話國華累葉珥貂風流獨擅崇禎中與鞏都尉永固竝留心圖史與諸朝士極文酒讌游之樂家有墨響齋摹拓金石文字裝池插架不減歐薛洪趙之富孫舍人國救采其詩入燕都游覽志甚多其後都中大疫國華死為冥官時降於室襲尚書孝升曹侍郎潔躬每述其遺事以為可載鬼董狐

西湖長隄

斜日長隄迴村煙接帝京路從溪外轉人在樹中行野
草石橋短沙鷗春水輕回看游賞地晴色萬山明



蓮花菴

去年花外客今復到長隄淺水兼天闊新蒲與岸齊鐘
傳高閣遠柳覆小橋低指點村煙起歸心促馬蹄

茅元儀 二首

元儀字止生歸安人崇禎初以薦授翰林院待
詔尋叅孫承宗軍務改授副總兵官守覺華島
旋以兵譁論戍有西崦又峴諸集

詩話止生宣力戎行富有撰述其論詩云今人與古人欲合當先離其
言誠走特下筆未能醇雅蓋竟陵之派方盛又與友夏稔契宜其染素
為繼矣

感懷 二首

步出齊東門朝霞一何絢須臾晴作雨雨過雲光爛攬

轡登牛山感彼人代換樂此匪爽鳩豈獨雲霞幻君子
矜晚節志士慎初建

長途經一月信信坐檀車有若作新婦三日不自如一
朝得快馬奮迅凌雲衢肢體既以適心神亦以愉解鞍
造前驛路險馬復瘡欲騎苦無鞍翻復思復與謀生願
難足已歎人有餘貧賤慕富貴富貴慕畋漁

葛一龍 七首

一龍字震甫吳縣人由貴生選授雲南布政司

理問有尺木齋等集

李本寧云震甫詩傳誦吳市洗濯里耳
還歸大雅 沈子勺云震甫詩汪洋超

忽窅然覃思 陳仲醇云

震甫詩以陶韋王孟為宗

詩話包山林麓之勝甲於三吳而詩人產斯土者前有蔡孔目後有葛
理問一時均有盛名讀其全集未免有楓落吳江之憾麻城劉同人序

之比於反舌無聲之日鷓旦不鳴之夜
是亦微辭也繼震甫起者有顧子超

初晴過孔先生園居得泥字

一雨百憂集新晴好杖藜偶從樵採去言訪石林棲屋
角蜘蛛網簷牙燕子泥留懽自初日不道夕陽西

偶作

山中春雪消澗底寒泉響谷口無人行嶺頭明月上

張氏隱居

老臥空山裏窮交若箇存風吹春草長麋鹿到柴門

舟夜獨酌

吳江明月出照我烏程酒酒盡無處沽明月空在手

東園村

曾聞東園公住此不復出年年開白花猶是漢初橘

渡石湖

風攪帆陰亂法幢山懸塢影墮吳江白鷗慣聽橫塘曲
來往翻飛自一雙

野橋懷郭聖僕

白板斜飛曲岸通朱欄照見綠波中故人別處猶堪憶
楊柳西邊蓮葉東

趙舜舉一首

舜舉字虞臣蘭谿人工部郎中有日下秋聲

中元對客

京國中元日微風暑乍收鵲飛明月樹人汎洞簫舟且

喜深杯滿休嗟大火流孟蘭僧社近鐘鼓襍更籌

史能仁 一首

能仁河南鹿邑舉人崇禎中知濟南新城縣事

調淄川遷兵部主事

王貽上云史公清正而才剛柔互用來為縣令庚辰辛巳歲大疫人多流亡時

邑境甘露降地生羊肚菜公賦詩以示百姓至今人誦之

新城示百姓

上天降甘露徧地生羊肚飢食羊肚菜渴飲甘露乳涕泣告吾民慎勿去鄉土

詩話仁人之言溥吉人之辭寡

文震亨 二首

震亨字啓美長洲人崇禎中官武英殿中書舍

人有文生小艸

詩話啓美相君介弟名挂黨人之籍後以善琴供奉思陵跡其生平於閩則周章甫為賦長歌於皖則阮集之為作詩序王尚書覺斯有言湛持憂讒畏譏而啓美浮沉金馬吟咏徜徉世無嫉者由其處世固有道焉當時以善琴同入供奉者有太常寺丞雲南楊懷玉會稽伊爾弢

次姚永言都諫左官詩

只此乾坤裏何方可即安江湖雖浩蕩涉履正艱難聖主垂春令孤臣保歲寒青山無限好莫近夕陽看

柳色

點染憑誰力東風著意吹自無攀折恨猶較淺深時金粉銷難盡樓臺遠更宜卷簾愁少婦望遠更成絲

徐電發云樓臺

遠更宜一語非工於画者不能道

張世偉 二首

明言經卷十七
世偉字異度吳縣人萬曆壬子舉順天鄉試尋
以賢良方正薦不就崇禎甲申贈翰林待詔有
自廣齋集

詩話異度籍甚詩
名庸庸絕少高調

題画竹卷

淇澳紀衛風渭濱存漢官彼美君子德致用非一端何
來託根非遂覺據地難或欲拔千條或須斬萬竿人情
夫豈遠忌等當門蘭湫隘匪所宜根株貴得完可以傾
朝陽可以凌風湍無爲人所媚無爲物所干庶幾松柏
朋相將保歲寒

居園即事

墻東堪避世新卜野人居巷隘難旋馬池寬好種魚閒
情雲澹處爽氣露零初但解蓬蒿趣窮愁可著書

歸昌世 九首

昌世字文休崑山人崇禎末以待詔徵不應有

假菴詩艸

詩話歸熙甫長於筆而短於詩
讀季思文休作覺後來者勝

秋懷 二首

壁蛩收殘音哀蟬振餘響圖書盈座隅覽古歎其往揚
子千載知鍾期並時賞窮通非巧拙徒爲增頽仰
不雨竹猶響未露草先濕齋空覺風來石暝如人立旅
客有歸夢柝驚夜何急舉酒酌桂叢言旋會將及

秋日懷獻之

小齋襟林木前後任
栖息幽境靜裏過
秋光閒處得天
風動琴書澹然白雲色
思與故人共惆悵
空相憶

偶成

出戶事如織不若深閉關
只緣長貧賤遂覺心神閒
有時靜看雲目數飛鳥還
栽花旣云勞灌畦亦孔躑不有
田園樂何方駐衰顏

叔父季思別業

性本耽幽寂自然愛丘園
時復執道書獨坐當南軒
清風池上來有客閒叩門
共坐竹林語蕭然酌一尊
隔溪聞犬吠襟以樵者言
斜日返深巷鳥雀林中喧
出門忽自得緩步忘遠村
歸途殊眇眇月白蘿陰繁

題古社圖

玄陰窮短晷淒風號北林
伊人美無度高會愜我心
願言振騷雅一返太古音
斯意空千秋玄覽一何深
高堂羅羣英前除鳴素琴
含情同慨慷對酒不能斟
紆鬱今古間曠焉發高吟
久要意何許睇彼青山岑

偶成

無薪安用魚無魚亦廢薪
漁樵俱川隱異業還共親
儒墨更相嗤千載仇其人大道本坦坦岐之乃不仁
衡門有閒士醉醒忘昏晨
長嘯慨終古曠世皆吾鄰
累累丘中子此理將安陳

槎溪道中

蒼茫岐路色立馬一踟躕樹到高原合村臨大澤虛孤
雲懸野鳥落日返樵漁數點青山外依稀是故廬

旅懷

亦有嵇康癖偏宜謝奕狂酒中遺往事夢裏失他鄉野
曠雲開樹窗明月在牀扁舟生計好最苦夜猿長

劉孔和一首

孔和字節之長山人大學士鴻訓子有日損堂

詩集

王貽上云公子文章
豪邁洞達詩尤奇恣

詩話節之豪士當寇陷京師破產結客起兵長白山中有眾三千人執
偽縣令狗於軍旋聞王師破賊乃率眾南下駐軍河北以兵屬劉澤清
澤清武人不知書既為藩鎮強作韻語示坐客節之慷慨言曰國家舉
淮東千里付足下未聞北面發一矢而沾沾言詩詩即工何益國事矧

未必工邪澤清大恚推案起坐客皆震懾節之不為動拂衣徐出澤清
立遣壯士二十輩追及舟中拉殺之時年三十一爾福藩遙授副總兵
官節之已死三日矣其詩好排
硬語大約以孟郊邵謁為宗

傷心吟

一日百痛哭天地不我容永隨光景夜願先萬物冬釀
愁為醇耐鑄憂為劍鋒味漓刃亦摧憂愁無終窮

黃翼聖九首

翼聖字子羽太倉人崇禎中辟授新都知縣升

安吉知州有蓮蕊居士詩選

子羽詩如么絃
哀玉自有天韻 徐元歎

云子羽心匠經營撰語卓絕 陳言夏云先生弱冠時尚鍾譚之學已
而官游簿書牒訴干戈戎馬之間發之於詩激昂磅礴無非忠君愛國
勤勞王事之語迨棄官歸里杜門謝客
其詩哀而不傷怨而不亂有小雅之遺

寇警襍詩三首

聖主勤焦勞盪寇屬元老專闔既歷年捷書苦弗早餘
 氛難遽消川峽復擾擾掠食日漸深鄰境多不保顧瞻
 斗大城捍禦悉州州伶仃茨簷下何處出牙爪殘毒既
 已酷憤厲忽矯矯白面山澤曜擁之建旗旄殫力答衆
 心身名總非寶

荒縣數十家十年再罹厄嗟此鋒鏑餘寇耗復孔亟孤
 城寡所援羣計在竄匿顧惟封疆義招撫竭心畫割糈
 募壯士八口不遑惜大義一再伸呼一應者百人心自
 有良如鐵附磁石刑牛告穹蒼下令明勸激毋或貳乃
 心毋或靳乃力天則有雷霆吏則有斬馘妻孥甘共危
 僮客盡持戟以身為衆先相期見勞績

兵氣動荒野黃雲黯城隅名義所共激孱民皆壯夫長
 鎗襍大棒角技鯨有徒披氊當堅甲揭裙為旌旗結聚
 各以類約束仍弗疎危樓圯雉間氣燄光四衢苦口相
 戒命各各念前車官民同賞僇殺賊勿踟躕

詩話賊兵臨新都崇禎庚辰十二月事也先是十月張獻忠渡昭河薄
 成都城中將士登陴以守遠近人民皆避難奔赴苗莠粟糶糶莫辨
 從祖君永公諱大定通判成都請以蜀王所發米五百石為粥以食餓
 者且潛察其蹤跡有可疑者以術羈縻之全活數萬計羣疑亦釋俄而
 寇猝至圍城公與布政使侯安國分守北門當賊衆來路於時文武將
 吏皆膽落公見城下一賊衣朱衣騎馬巡軍用強弩射之中其胷錚然
 有聲謂安國曰賊雖多未及整可擊而走也乃同參將鄒鳴率壯士八
 十人出戰殺三人俘二人奪馬十疋入見巡按御史陳良謨提二賊頭
 顱血濡縷漉堂上御史大驚離席曰別駕相門子乃能殺賊可敬也是
 夜賊退屯柳溝浦去城二十里而遙事定御史上戰功止及煮粥活民
 之勞而已此事長編野史
 俱不載錄子羽詩附記之

春夜宿草堂寺

最愛臨江寺殘春始一行落花隨水汲亂竹過墻生雨
帶新泉響燈搖古院清如何聽鐘後猶有未銷情

渝城度歲

風俗他鄉異巫歌達四鄰江明無月夜猿喚不眠人眷
屬生兼死年光臘帶春客中艱一醉辜負物華新

村居襍興

三首

廿四番風取次來梅花落盡杏花開画梁無數空巢在
社雨蕭蕭燕未回

休誇紅紫鬪芳菲開到荼蘼春已非恥逐游蜂與舞蝶
別尋一徑綠陰歸

閒花無數爛空庭別有黃金綴決明一自杜陵矜惜後

秋風秋雨獨關情

文介石廣文

自古恩深責亦深更誰清夜細追尋官階最是青氈冷
十載猶懸故主心

蔣臣

二首

臣初名姬胤字子卿更今名字一介桐城人崇禎中舉賢良尋授戶部主事

詩話一个早見知於太倉二張注名復社其後柴車北上為倪公玉汝所薦召對平臺甲申寇變間道走淮陽依史公道鄰史公留參軍務一介歎曰以一駒虞將五狼其能久乎遂辭歸其詩雖乏渾涵亦自蕭散

劉憲石招遊虎丘奉答

山川猶昨日金虎氣全凋萬事蹉跎盡千秋涕淚遙寒

蟹依画舫欹柳臥平橋勝地欣相見何年復此宵

庚辰秋杪客清湖所期不至拈壁間韻

榛蕪悲故國垂老更無家寄壘如新燕為園學浣花苔
痕深沒屐菜甲淺含沙即此堪終隱人生會有涯

吳日昴 一首

日昴字函三桐城人崇禎中中書舍人有世儀

堂集

拜墓

白下僑居久身心亦漸安祇因霜露感不憚往來難
臘丁年改流離丙舍寬傷心無限淚忍向寢門乾

王廷宰 一首

廷宰字昆翁號鹿柴松江華亭人補嘉興縣學
生以貢任六安儒學教諭遷沅江知縣有緯蕭

齋集

詩話鹿柴先生占籍嘉興注名鴛水詩社乙酉之春過余外舅馮翁小
飲余陪末坐忽問曰曾學詩否對曰未也先生乃言曰詩有一學而能
者有終身學之而不能者洵有別才焉余問學詩何從曰試作對句酒
至先生舉古人名俾屬對偶記憶顧野王對沈田子鄭虎臣對沈麟士
蔡興宗對崔慰祖蕭子雲對任伯雨魏知古對顏相時吉中孚對温大
有楊完者對晁補之杜審言對蕭思話貢師泰對齊履謙任蠻奴對張
惡子金安上對鄭居中劉辰翁對逢丑父韓擇木對李栖筠蔡有鄰對
徐無黨王巖叟對阮佃夫李思齊對石作蜀柳三變對張九成鄭櫻桃
對郭芍藥王僧綽對馬仙理秘彭祖對庾黔婁劉方平對徐圓朗劉仁
本對范道根先生見余應對之不窮也語馮翁曰此將來必以詩名世
其取材博矣自遭喪亂不復見先生并不復見先生之詩僅
從社草中錄其一二回思知己之言是亦蒙之李邕王翰也

鄴園

置酒娛清夜西園鶩華轂素月升澄景微露泣佳木灼

灼芙蓉姿臨波漾輕縠四顧命賓朋灑藻競豐縟感彼
蟋蟀篇勞生何局促鼎鼎百年內歡樂苦不足列坐進
芳醴彈箏弄織曲霓旌遠層阿鳳吹流深谷遨遊及良
時庶以快所欲

送高明水工部營桂府於衡州

楚塞衡陽壯姬公叔父尊三湘疏地脉一柱表天門桐
葉圭初剪蘭臺賦尚存聖朝寬物力採權亦須論

徐時勉 三首

時勉字克勤蘇州嘉定人崇禎庚辰以貢生特

用知澄城縣事有蘧菴東歸橐

歸元恭云克勤詩蕭然
開曠有陸放翁之風

詩話崇禎庚辰思陵留意人材俾下第舉人及廷試貢士俱留特用悉
畀以民社之任於是舉人史惇以下一百六十三人貢士吳康侯以下

一百人許同進士出身惇等請援例謁文廟行釋菜禮并立石太學題
名閣臣張四知持不可思陵特允惇所請大學士周延儒奉勅授文太
僕寺少卿兼翰林院侍書朱國詔奉勅書丹篆額工部營繕司郎中王
顯監刻立石於西南隅蓋自萬曆丙辰錢士升榜至魏藻德榜九科有
題名而無記及是始有記焉特用榜死事者戶部郎中金壇徐有聲兵
部員外郎升貴州安平道副使臨川曾益金滄道叅議寶雞楊畏知關
封知府武進蔡鳳黃州府同知弋陽王府輔國中尉朱統錫邠縣知縣
贈河南按察副使安邑李貞佐汾陽知縣西安山陽劉必達大同山陰
知縣慶陽衛李倬鞏昌安定知縣臨海應昌士四川興文知縣漢陽艾
吾鼎呈貢知縣鍾祥黃卷立賢無方未嘗不收國士之報克勤復社者
宿注名特川榜中與陳孝廉瑚歸處士莊敷高尚之節亦不愧是
科者博金壇人官至九江太守野史撰慟餘襍紀者即其人也

種柳和白香山

樹木十年事吾衰計轉忙小莊疎竹外處處插垂楊藁
短初成帚身高欲過墻年逾三五後遮莫暑風涼

上元日憶鄧尉光福諸山

東風殘臘早探支改歲尋春較客遲老興恰當全嬾口

明言總卷之十
梅花又過半開時雪消最愛西山路頭白重吟東閣詩
拄杖籃輿迷望處年年採蕩看燈期

荷亭

輕風不送市塵塵出水芙蓉面面新莫道老年心易足
還思兩槳蕩舟人

吳德操 一首

德操字鑑在桐城人由諸生仕至大理寺丞有
北征草過江集

秋興

莆田七月海風秋誰到江東寫我憂露冷芙蓉王儉幕
書藏夾漈鄭樵樓卜居未有安危信行路方知出入愁

笑指雙星河漢闊明朝未必渡牽牛

浦羲升 一首

羲升字朗公無錫人補常熟縣學生崇禎辛未
由歲貢生除海寧儒學訓導有赤霞集

石城

挂席秋江上涼生薜荔衣雨聲蘆葉偃風色浪花飛方
度龍潭驛隨過燕子磯石頭城下泊坐對月霏微

徐同貞 一首

同貞字伯固一字乾行海鹽人承父從治蔭襲
錦衣衛百戶歷官都指揮同知

寒食郊行

二月春寒未減衣嫩晴天氣日熹微
桃花落盡水初漲燕子來時筍正肥
林外酒人浮白去莎邊游女蹋青歸
却嫌輸與東京路尚欠郊原綵索飛

丘上儀一首

上儀字維正武進人由武科進士官海鹽衛遊擊經亂隱居紫雲山

詩話維正武人恂恂若文士雅歌高會酒酣間一賦詩其居官甚廉或告之曰將者知信仁勇嚴不聞以廉取一介亦何傷維正笑弗答也晚躬耕紫雲山麓有盜劫行舟維正毅弩射之百步外中其日盜乃遁舟人造謝不見又嘗負薪三百斤行山中汛兵欲奪之盡為所縛兵乞哀縱之去龍山祝耆老集隱君子十四人計其齒盈千齡目曰千齡社維正與焉席上詩成以維正為擅場云

千齡社集詩

孤村冒雨墊綸巾一櫂衝寒破水淪
自是素心堪共侶

好將末俗使還淳藏身曾學姚平仲
招隱誰呼祁孔賓良會詎應誇競病
舉杯且盡甕頭春

巖二首

煒字伯玉嘗熟人文靖公訥之孫有滄浪集藴

山草

詩話伯玉始為祁陽王客繼入何雲從瞿起田幕中晚移家隱粵西獮人洞其妾鄒淑芳字曰蕙祺吳江人能詩從伯玉入楚轉徙蒼梧年二十四而夭有詩百五十首題曰三生石草句如洗手自憐十釵指甲何因又長兩三分玉簫舊譜回文句瑤瑟新絃續命絲趙瑟欲調無奈嬾楚腰先細不堪愁皆婉約可誦至生日詩云笑采秋花斟壽酒還愁薄命不禁霜則成讖矣淑芳詩病革自焚此伯玉所記憶者淑芳墓在端州伯玉省母曾一還里門晚仍入獮人洞不知所終

秋日過萬里橋見朱雲子寄詩因憶舊事悵然有作

寥落天南雁淒涼見素書故人千里外舊事十年餘壯
志愁銷盡閒情賦久虛不知憔悴者錦瑟意何如自注雲
子寄詩
有舊恨青衫上新
詞錦瑟傍之句

過清溪驛和題壁韻

風塵天下滿此地尚煙霞叢篠臨江偃寒花倚石斜輕
雲歸暮嶺落日戀平沙何限河山意灤西又寄家

戴重九首

重字敬夫和州人由貢生除湖州府推官有河

村集

劉伯宗云敬夫詩學杜少陵未嘗作唐以後語 黎美周云敬
夫詩磊落孤憤若鶴警高松龍吟潭水 張爾公云敬夫詩感
時諷俗爲多以視西
臺慟哭異世同揆

宿店

雞號扉客披衣客莫起有風雨店家驢馬官牽去明朝
御史來行部

五月五日

蚤讀離騷經無哀自流涕今乃招其魂折花臨水祭忠
信衆所疑君臣道日替九門未可通九州其何濟橫江
張水嬉子女肆妖麗俗歡移古悲羣狂重吾疾但聞鷓
鴒鳴延望南山霽

泊鎮江口

病髮搔皆落長衾擁有餘明星入江艇濁酒出州廬
海聞虧引冰河說梗儲舟喧愁不睡呼火讀方書

烏江項廟

夕陽雙雀廟孤艇繫烏江病葉風相戰寒潮夜不降
劍留蛇瘞井轡絕馬號椿如此千秋恨霜鐘儘客撞

烈山舟中

江火燒茶白山雲曳布帆櫓搖紅荻澀網挂白魚饒
淮麥炊難輒吳鹽歡不鹹家人同汎汎十載一黃衫

半箇山

谷口三叉路人家半箇山驅將豪犬出呼使角鷹還去
此歲未久傷哉邨已艱偶爲先友卜松柏水潺潺

濠梁

布衣多難客他鄉結客千金計渺茫萬卷讀書悔癡絕
十年磨劍拚佯狂清天鴻鴈月千里白露蒹葭水一万

不得故人書半紙秋殘懷抱極淒涼

陶隱居丹井

華陽舊井石泉清猶記山中宰相名賸有丹成堪辟穀
不曾一粒餉臺城

春燈歌

年年人日到長干取次看燈不忍看十四樓邊新月夜
銀箏小袖歇春寒

王時敏一首

時敏字遜之太倉州人太傅錫爵孫承祖蔭官
尚寶司丞有西廬遺藁

西田感興

自媿平生百不能桑榆息影倚枯藤微茫暝樹孤村杵
明滅漁舟遠激燈往事淒涼難再說新愁襍沓最無憑
况今禾黍淹淫雨白日秋來見未曾

申演芳 一首

演芳字孝觀太師時行之孫承蔭中書科中書
舍人有玄間閣詩草

山中樂

山中之樂樂何如莫樂朱明孟夏初竹長雞頭新粉落
籬編鹿眼晚花疎提壺勸酒村村鳥積雪縹絲處處車
最愛田田小荷葉呼童量水種紅魚

詩話舍人山中樂四時皆有
之而夏日一首有醇無疵

汪珂玉 一首

珂玉字玉水徽州人僑居嘉興崇禎中官山東
鹽運使判官

詩話玉水不卑小官留心著述所輯珊瑚網一編與
吳下張青父品題並駕惜乎詩州甚富泯焉無存

題孟蜀宮妓圖用唐子畏韻

芙蓉城裏試仙衣詩酒留連坐式微莫恨李家降表熟
君王原愛著朝緋

李自明 一首

自明字先脩嘉興人以歲貢除揚州訓導城破
死於官有謫仙居橐

覽輝樓

雨後驚濤響石磯望中煙樹轉霏微湘江直北陽臺路
舊日行雲何處飛

林徵材 一首

徵材字魯生連江人以例貢授藩幕

重過田公園

門巷春深碧艸齊花枝大半委黃泥林鶯認得尊前客
依舊飛來恰恰啼

許正蒙 一首

正蒙字聖初歙人官中書有西陽近橐

舟經橫塘憶桐江舊游

輕舟何搖搖來自青谿曲層崖落深翠新波湛空綠我

家漸水東一川接天目對此頗相似殊令幽思足將攜
素心人共著桐君錄

陳紹英 一首

紹英字生甫仁和人承蔭仕至貴州按察副使
有五石居詩草

吳宮詞

菡萏花香一水流吳姬歌蕩木蘭舟梧桐秋色關何事
長遣君王對樹愁

蔣茂 一首

茂字鄧林嘉善人由監生官文華殿中書

初夏

水沉煙裊翠參差永晝窺簾燕語遲簇簇桐花飛不已
鷓鴣啼過白蘋池

陳濟生 一首

濟生字皇士長洲人官太僕寺丞

詩話皇士經亂歸田緝啓禎兩朝遺詩又命工傳寫明三百年來忠臣義士象裝以為冊可稱好事矣惜其詩鏤板未終而象亦為蠹魚所蝕覽觀者惜焉

秋山和貫休韻

秋來祇是入山宜坐到泉聲幽咽時清淚欲零誰許見
峰頭惟有老猿知

李士標 一首

士標字霞舉嘉興人以縣學生選入國子監除

上林苑署丞遷寧海州同知有蒼雪齋詩存

江行即事

渚鷗一一泛春聲江面煙消萬里平花月故臨楊子渡
布帆無恙潤州城蒼茫曉色迷鴻雁欵乃歌聲怨杜蘅
放眼正愁煙水闊亂山天際忽縱橫

彭堯諭 一首

堯諭字君宣商丘人南昌通判有西園公子集

過徐州見賊營

旅魂何日定間道走彭城路側人煙斷山頭賊火明鼓
輦連客舫涕泗失歸程親見河東岸妖氛奪漢營

陳洪綬 一首

洪綬字章侯諸暨人國子監生

詩話章侯四齡就婦翁家見新墜壁登案畫漢前將軍關侯象長八九尺翁見下拜遂以室奉侯蓋繪事本天縱也崇禎間與北平崔青蚓齊名號南陳北崔中年縱酒狎妓自放客有求畫者罄折至恭勿與及酒邊名妓輒自索筆墨雖小夫穉子徵索無弗應晚混迹服僧衣自稱老遲亦稱悔遲亦稱老蓮有妾吳淨髮亦善花草錢塘馮秀才硯祥詩云吳興公子工花州侍制丹青步絕塵三百年來陳待詔調鉛殺粉繼前人余每觀其真蹟所畫美女姚冶絕倫今則贗本紛紜多係其徒嚴水子山子司馬子雨輩所做率皆蘧條戚施矣詩頗饒逸致惜流傳者寡

桃花馬上絕亡友海
盛教論金燾所誦也

贈伎董飛仙

桃花馬上董飛仙自擘生綃乞畫蓮好事日多還記得

庚申三月岳墳前

黃孔昭一首

孔昭字含美吳縣人舉崇禎癸酉鄉試選授大

姚知縣有石衣翁南歸州

詩話含美一命投荒他離天末已不作歸田之夢其于向堅端才有懷二人眼枯足繭蹈白刃尋之卒御以全歸吳中好事者編為傳奇演之春秋之社南歸州一卷成於愴怳倣擾之中無暇持擇觀其紀述恒有野史所未詳者若夏呈貢之死事是已夏諱祖訓字仲有秀水學生以歲貢除知呈貢縣事含美稱其起義師失利一城屠戮殆盡知縣被刑最慘則余鄉黨多未之聞含美有詩哀之此宜亟發其幽光者也夏君與先太傅鍾秀坊舊宅望衡而居入門一徑繞至水榭余童子時從先子造君獲聞講論画义書卷恍然在目鄰有死封疆之臣耄矣讀含美詩始克知之附疏其略庶後世有述焉

哀夏呈貢祖訓

夏君一命均奉檄入荒徼合并五華寺杯酒共吟眺丈夫慨以慷風雲坐談笑何期受重圍一死臣節效吏無黃犢賣路有青蠅吊碧血何處藏寒原走殘燒

劉思祖一首

思祖字長孫永嘉人官江西叅將

汪魯望孝廉軒

誅茅託林棲結志在玄賞芳美歇春華涼飈薦秋爽鳴
琴向寥廓長嘯散蒼莽明月揚素輝疎篁發清響尊中
幸不空方外恣獨往偶坐興未闌還思擢煙榜

朱茂時五首

先世父字子葵萬曆中補秀水縣學生承蔭官
至貴陽知府有咸春堂遺橐

詩話城南放鶴洲相傳為唐相裴休別業名曰裴島然考新舊唐書俱
不言休流寓吳下至元嘉禾志弘正間儀真柳瑛府志萊陽于鳳皆補
志亦未之載或曰南渡初禮部郎中朱敦儒營之以為聖洲名其所題
雖不見地志觀樵歌一編多在吾鄉所作此說近是世父拓地百畝自
湖之出有堂有亭有橋有船有岡有榭有庖有溜禰樹花果瓜疇芋區
菜圃靡所不具陳少詹懿典為作記董尚書其昌為書扁李少卿日華

為寫圖後先觴咏者題壁淋漓今則大
樹飄零高臺蕪沒止存臥柳斷橋而已

鶴洲夜歸

秋月清於水孤舟放鶴歸不知荷葉露風卷上人衣

黔中曲三首

疊嶂曾無三尺平盤江狹處鐵橋橫短裙窄袖花蠻女

宛在鞦韆索上行地無三尺平黔中諺也盤江鐵
索橋行者動搖而蠻女不懼

土風不改古牂牁銅鼓迎神蹋足歌一種黔南水西鬼

黑羅羅笑白羅羅白羅羅比黑羅
羅更剽險難制

高髻纏髻一尺長淺藍羣子趁時妝一春遠信雞難卜

暗祝心期拜竹王黔女挽髻襍以馬
鬃羣尚淺藍色

在平道中

殘星數點照人行撲面涼沙惹去程回首鵲華山盡失
又騎羸馬過荏平

朱茂昭 一首

先叔行第三字子藻天啓初補秀水縣學生承

蔭官都察院照磨

詩話先叔柳下和光長卿善病營宅於真如寺西夾岸紫藤萬條寒玉
當春梅放不減鄧尉西溪四方名彥爭過為文字之飲去世父鶴洲不
遠游者比之
何家大小山

楊明府龍友以山水画扇見寄并訂游吳之約以

詩代答

楊君黔州客愛寫吳下山沙中羣雁起天末孤雲還橘
柚經冬樹楊梅銷夏灣扁舟何日共吹笛到吳關
范長倩
云全詩

清越

明詩綜卷七十

明詩綜卷七十一

小長蘆 朱彝尊 錄

歙州 汪立名 緝評

陳繼儒 三首

繼儒字仲醇松江華亭人有省公全集

靜志居詩話仲醇以處士虛聲傾動朝野守令之臧否由夫片言詩文之佳惡冀其一顧市骨董者如赴畢良史推場品書畫者必求張懷瓘估價肘有兔園之冊門闥鷺羽之車時無英雄互相矜飾甚至吳綾越布皆被其名竈妾餅師爭呼其字今遺集具在未免名不副其實焉

月下登金山

江平秋萬里山靜月三更彷彿寒烟外孤洲有鴈聲

春日訪殷東皋

櫻桃花開春可憐何處游人不放船却羨白頭殷處士

鵝鳩聲裏獨耕田

山居雜詩

青草湖邊白石西竹籬茆屋酒帘低飛來飛去雙黃鳥
不到濃陰不肯啼

王留一首

留字亦房吳人穉登子

淮北道中

沙灘高下浴鳧鷺新出菰蒲綠未齊移橋過淮應化枳
種楊當路半生稊船頭鼓角頻逢驛河上金錢浪築堤
醉後無端千里夢直隨明月到深閨

茅維一首

維字孝若歸安人有菰園集

屠緯真云孝若天才絕高於體雖所不吝陳仲醇

云孝若詩詔秀清華絕無累句梅季豹云孝若陶鑄古人第琢句磨精百諧暢

早秋寄允兆

秋風難作客匹馬欲南歸隴塞黃雲合江淮紅葉稀干
戈愁獨卧鄉國夢全非已卜刀鐔約滄洲可拂衣

盧原一首

原字原甫南海人有五湖游草

甘露寺望金焦

北固山頭寺崔嵬瞰大江縱無甘露下應有毒龍降陳
迹羊爲石新雛燕入牕望來浮玉近遙對碧峰雙

卜舜年四首

舜年字孟碩吳江人嘉興縣學生有綠曉齋集

詩話孟碩家居盛澤幼赴嘉興童子試時安福顏欲章知縣事亟賞其文拔置第一遂補諸生讀書東塔寺尋游陳仲醇之門負才傲世恒衣茜衣入市題其門曰鄉人皆惡國士無雙惟與同里張汝培端甫結契時相和酬孟碩既失意坎壈不平仿屈平楚辭作滔滔章假帝詰河伯之文有曰東聯淄汶兮南絡沅湘黑者錯白兮弱者間強災既淪於入坎兮害乃基於剝牀翹商羊之子舞兮又安親儀鳳之踰踰固帝心之欣禍兮亦今俗之好殃又聞杜松劉挺二將喪師賦長謠千餘言以詒楊鎬平居好結客客至必留坐是奇窘或三日不爨終不乞米於人也詩尚崛奇間有合律者

邨社迎神曲

旦旭兮瞳矇神鴉起兮雲中冰于髮於蘭湯兮振于衣
於蕙風潔齋俟于土公土公不來兮勞心忡忡

黃浦晚度

殘照收黃浦孤舟何處依沙昏秋鴈落潮滿夜漁歸薄

海山川曠前途廬舍稀帆輕天路近直與鶴俱飛

冬夜垂虹橋

卸馬垂虹畔深宵感慨增橋明霜正下江遠月初升吏
醉城無柝僧歸塔有燈王風京路阻欲詠媿無能

湖上送別

西風奮枯林潮沸盛湖晚淚眼對殘陽看君行漸遠

姚士彝一首

士彝字叔祥海鹽人國子監生有蒙古堂詩集

薛潤孃七夕生日

生逢烏鵲渡河秋乞巧今番免上樓莫訝眼邊多俗物
天孫亦祇嫁牽牛

邢昉 三首

昉字孟貞高淳人崇禎諸生有石臼集

陳伯璣云孟貞詩無

一暢懷語讀之令人增感

聞亡女訃寄內

垂老常嗟別書傳江漢稀青鬢憐弱息秋草忽同歸多
病愁難共還家興轉微尚餘殘淚在相對灑牛衣

月

偶聽烏啼漏未殘小池冰合夜深寒最憐一片霜天月
已是離家十度看

口號

蜀江船不到三巴湖南船不到長沙滿地干戈關塞裏

行人那不早還家

張 屈 二首

屈字醒公長洲人處士鄉里私謚貞節先生有

醒公詩集

邢孟貞云醒公詩高寒類孟東野幽渺過之讀之使人
不懽 金孝章云醒公汲幽梯峻返之冲澹希夷不可

物方

山居懷金文裕

江光映林際纖月微微落冥冥靜夜鐘沉沉響深閣言
念君子交於道信不薄空谷常感懷終不我離索

弔古

弔古不疾哭欲哭聲已吞嘗膽吾自苦對世不敢言中
夜望星斗失序何足論至人竭精力能使移崑崙夏月

落天霜方報君子恩

邵昇遠 一首

昇遠字

松江華亭人

田家樂為陳孟言賦

香稻收花穗已齊幽棲渾似灑東西萬竿修竹千叢菊
十角黃牛五母雞婦起炊糜朝出饁客來留榻夜分題
橙黃蟹紫新醅熟日日何妨醉似泥

沈弘之一首

弘之字茂之蘇州嘉定人有清溪草堂詩藁

李本

寧云茂之近體含蓄
不露得唐人之遺風

濟寧舟中望月憶家

野曠天連水登艫四望寬家逾千里隔月訝兩回看客
裏光相對閨中影自寒郵籤計程速定已夢長安

施武 十三首

武字魯孫別字百靈長洲人崇禎間游于滇有

楚游草西覽篇

詩話魯孫孝子佯狂翫世善草書鄭孝廉士敬謂曰君書直逼二王不
雜唐宋以下筆法魯孫大喜於同人廣坐中編題箋扇呼士敬曰君頗
知書吾書究誰似士敬謬曰今日書不見佳魯孫瞠目左右視擲筆而
去嘗語人曰吾於詩極力摹擬古人僅可雜之王仲初集中耳今吳人
罕有知之者處士金侃亦陶藏其藁經候官曹能始
墨筆點定子亟錄十三首滇黔風景可得其大槩焉

烏雅關

朝上烏雅關暮下烏雅關老烏啼啞啞行人還未還

關索嶺

高嶺呼將軍將軍祀其上行人仰望時白雲隔千丈
相見坡

上坡面在山下坡山在面相見令人愁不如不相見

鳳羽詞 鳳羽山名

鳳羽低連鄧睽川山頭流水屋邊田額尖新樣姑姑帽

五月羊皮帶汗穿 鄧睽詔名姑姑帽滇人皆以羊皮繫額寒暑皆披

街子詞 滇中以作市曰街子逢辰亥戌未日為期

豬街纜罷又龍街蠻女牽羊入市來背上擔兒嘗慣負

胭脂落盡小桃開

土官出山詞 土官唯參謁官長始冠帶居常但用卓綾青布裹頭

嗚嗚牛角滿山陂腰下橫刀弩箭隨雜部椎頭皆束帛

卓綾纏額長官司

煮鹽詞 滇中鹽井四唯黑白二井課稅甚多餘不及焉

使君不及鬱林廉舊例逡巡新例添白井爭如黑井好

一斤水煮半斤鹽

出獵詞

秋高出獵草根枯漫縱韓盧不用呼新襲土官誇武健

側身馬上獲雙狐

歸化詞 滇中山茶天下第一唯歸化寺者其本合抱花大如孟國初已前物也送來宦游羈客留別交好至此莫不墮淚

鴛鴦夢斷綵樓空馬首蕭蕭故向東歸化寺前多少淚

年年三月蜀茶紅

麗江詞 麗江府即古笮國地也地寒五穀希少惟產良金毛布之類方伯用貢金必索其直從來直指公皆不按其地聽之而已人皆

耳上貫環好衣
紅與西域相類

麗江水繞雪山寒郡縣羈縻異國看千里羅步地名無貢
賦黃金有價不輸官

永昌詞

永昌古哀牢國也國初流配獨多吳人故語言風俗宛似南都為滇之首郡

漢武窮邊開永昌哀牢部落散丁當流人不學花蠻語
城郭風烟半建康

寶井詞

寶井在姚關萬里外非容易至販寶者止于緬中交易緬中多瘴癘除三冬與初春通夷者不敢出

緬中花落滿蠻山千兩鴉青馬上還寒食雨飛防瘴癘
漢人不敢出姚關鴉青寶名時適有是寶重一兩三錢價三十貫

賣雪詞

大理蒼山雪六月不化市上女郎賣之猶吳下之賣冰也

雙龍關裏百花香銀海逶迤抱點蒼六月街頭教賣雪

行人錯認是瓊漿

鄒

潏二首

潏字中朗秀水人縣學生

江行望廬山作

亦知山有寺咫尺見雲封瀑布千尋水香爐何處峰向
晴微見樹卓午詎聞鐘來往驅塵事深悲負短筇

武陵

仙源應不記年華洞口今開幾樹花若使重來津可問
扁舟我亦願移家

卓人月

二首

人月字珂月仁和人貢生有慈淵集

詩話珂月才情橫溢所撰續千文
穩帖而奇肆詩亦不為格律所拘

泊烏鎮不寐作

逆風逗歸期今夕寄淺港月出人不知閉戶若羸蚌遠
寺燈微明未罷老僧講良久喔喔聲荒雞引其項

贈女鬟紅衣

石家醋醋喜穿緋裹手擎觴率意飛坐上恨無姜石帚
長歌一曲惜紅衣

華淑 三首

淑字聞修無錫人

雜詩

斲木為車其半為輪車自招搖輪何苦辛

洞庭西山

圓湖比滿月青山猶挂影晴陰網輕瀾深翠積遙嶺滌
洄柔櫓前如魚狎藻荇戀彼楓袖香丹黃點妍靚終期
宅此居一樓一舴艋舴艋石公遙樓當銷夏冷竹木侍
巾裾烟霞開簿領

消夏灣

平湖添一曲風色遂全幽晴泛亦疑雨山居猶在舟橘
橙垂戶戶菱芡聚洲洲不信偏宜夏暄涼儘可游

林雲鳳 三首

雲鳳字若撫長洲人

詩話若撫當鍾譚燄張之日守正不回詩篇極其繁
富惜知者寥寥困阨終老相如遺草已不可問矣

行路難

上客且莫餐聽歌行路難
茹荼知味苦食梅知味酸
蜜中亦有螫棘中亦有蘭
人情反覆君自看泣者未必感
笑者未必歡曲如羊腸鬱以盤
令我喟然摧肺肝

韓淮陰廟

韓侯遺廟在過客不勝悲
未請真王印先收大將旗
功忘百戰後恩報一餐時
何似清淮上終身把釣絲

憂邊

絲綸閣下議東征為遣元戎出
大明邊月曉懸弓劍影
朔風秋散鼓鼙聲滄溟萬里波
臣國紫塞三千浪子兵
奏凱木聞糧援絕不知平壤幾時平

項真一

真字不損秀水儒學生貢入國子監
有西湖草

詩話不損以門才自豪兼綜今古文深為李長蘅聞子將所賞有御史巡按至浙試士子文經書發題外俾作一詩題是賦得多雨紅榴折不損書法絕倫以行草縱筆寫之同學慮御史必怒咸為不損危而御史竟拔置第一益自負儻莫不羈入修門坐事瘦死于獄予嘗見其為閩人銘梳奩曰人之有髮旦旦思理有身有心奚不如是筆法極其飛舞繹其語殆亦非真狂生也

社集分賦得竹林

入林非任誕懷抱良有託把臂愜同志痛飲戀狂藥
修竹何蕭蕭微風籜已落故叢擢纖枝碧影墮
杯勺盤桓不能去嘯詠或間作管絃非所好况乃靈囂号仰視飛鳥翔醉眼空寥廓契此考槃趣謝彼影纓縛寄語道旁子沉冥與爾各

謝夢連 三首

夢連字孟草長洲人有遺詩

陳玉立云孟草詩使事必穩標韻必諧 金孝章云

孟草遠絕時調詩以自然為宗不失唐人風韻

送友人游天台

細雨靡蕪綠扁舟渡若邪春流飛竹箭暮靄隔桃花佞佛何妨酒游仙莫問家儻憐人外癖分我赤城霞

治平寺寓友人攜酒見訪

吾友攜尊至開門黃葉深斷雲孤岫冷斜日半湖陰獨往無千古相期有寸心行行難以別明月在長林

秋夜

木葉始微脫庭空蔭薜蘿誰云秋氣慘我愛夜涼多林

逗纖纖月雲浮澹澹河坐深人境寂新鴈一聲過

何大成 一首

大成字君立嘗熟人

抵夔州覓少陵草堂

成都草堂今若何且向西瀼飽經過亂山不斷烟雨色
匹馬時聽巴渝歌峽中長年布帆穩驛路官長油衣多
吳趨老人真好事貪訪遺跡空蹉跎

邵濂 一首

濂字茂齊嘗熟縣學生

馮已蒼云邵君詩清曠玄澹

雨

終日雨如絲連山芳草碧庭際孤雲屯遙村暮烟積

渡行人稀圓沙一鷗白寂莫想晤言誰破蒼苔跡

屠應韶 一首

應韶字韶甫秀水人有松吟草

贈歌童

弱質偏姚冶清歌意獨新未須聞別調梁上已飛塵

李翹 二首

翹字時實松江華亭人有樵雲居橐

感遇

幽蘭出深谷冰雪揚芬芳天桃得春風榮華耀朝陽萬物各有時盛衰詎可量君子重制行通塞夫何傷對此遲日嘉且進花前觴

寓言

松柏有蔦蘿生死共依附柔弱不自持垂垂百尺樹草木匪金石榮華寧久駐摧折非所期飄零更誰顧

丘遂 一首

遂字叔遂嘉善人初為僧字凡可中年以口舌忤鄉里貴人反儒服補縣學生有丘叔遂詩草

江上雜詩

竹筏歸從柳外汀鷓鴣隊隊晚風腥漁師不避豆花雨翻脫蓑衣覆酒餅

吳拭 三首

拭字去塵休寧人有遺橐

徐武子云去塵忼慨重然諾中年以結客傾其家晚栖吳市尋

避兵虞山困厄死其詩自出機杼決難泯沒朱子答云去塵風饒于
質破產結客贈予手製糜丸不啻沈珪對膠也客金陵編題十寺廊壁
七言如花雨已過寒食後風箏又傷社壇斜變鄉有夢三千里閩海無
書二十年半偈歲深香積飯一番春老木棉衣移家轉近寒山寺探篋
惟餘秋水篇衣上露涼飄柏葉鬢
漫霜重壓蘆花誦之神采溢目

苦寒

嚴霜摧百草北風何其涼我愁豈在躬憂此道路長忽
忽行役中不復知景光凝冰屬仲冬萬物咸閉藏吾非
寒號蟲乃思驕鳳皇躊躇三歎息落日照路旁

無題和斗生

二首

海外雲生碧浪陰蘋鱗蒼鴈總浮沉寥寥天漢雙星小
寂寂梨花一院深貞玉有光還易見明珠無定杳難尋
輕鸞欲繡愁無力除是靈芸七孔鍼

巫山遠在暮雲中愁隔春燈一點紅莫道金刀難翦水
須知紈扇也驚風化為蝴蝶飛纔竝除是鴛鴦睡不同
最是游絲無賴甚又牽春去過牆東

沈章

六首

章字宗玉嘉興人國子監生有苧莊集

詩話上舍為亡弟千里婦翁詩頗崛奇所居苧莊略徇相通環
以水竹余嘗讀書其地今其二子皆登鬼錄遺書莫可問矣

示弟漣

蚤則有蛹蠶則有績矧伊人兮胡不爾德一解昔我先人

實懋厥功靡不夙夜克纘其宗二解伊余懷兮程是稼穡

一經不遺以永朝夕三解朝斯夕斯日月言邁令聞或忒

我心匪懈四解人亦有言聲類是求相彼蒼鷹氣化為鳩

五淵冰在前惕焉戾止繩墨在御敢以勗子解六

淮陰侯祠

淮水十斗泥半石行人入門三歎息王孫功高天下疑
赤龍雌雉俱慙德前有渭水後桐廬進則不足退有餘
曷不歸釣城南魚

靈谷寺看梅

下馬看碑度孝陵山椒十里樹層層半開香氣清於水
一路人家靜似僧春動粉鬚都化蝶夜寒花片欲成冰
思憑一枕羅浮夢月白烟黃睡未能

岱宗次吳秋圃師韻

四十里行程半日行下觀鄒魯井中耕樹從樵口標秦漢

人與繩籃託死生澡髮不知何處雨曝衣猶及上方晴
東風無力吹雲去抹斷齊州水一泓

隋堤懷古

邗溝新碧晚濤平楊柳曾遮殿脚行誰道雷塘歌吹歇
月明重按玉簫聲

天池寺

竊栗猿雛戲法幢天池中劈石門雙深山不是無燈火
解惜飛蛾夜觸牕

邵德生二首

德生字大生
人崇禎中儒學生有清聞軒

橐

夜度清遠峽

枕上不見山但聞水聲駛自非山百尋水急那如此

楓亭

草樹隨方別楓亭故有楓故鄉烏白樹霜色更深紅

陸壽國一首

壽國字靈長長洲儒學生天卒鄉人私謚孝簡

子有嶺雲集

虎丘春步

好鳥語芳樹春山遠近看攀厓振蘿策度塔跨雲鞍縞袖翔飛燕青箋賦木蘭雨餘客去後新月上欄干

吳道約一首

道約字博之一字亞侯桐城人縣學生有大易

山房橐

懷方子恒

王孫別去草萋萋江麓殘烟送馬蹄我念故人腸斷絕小橋流水夕陽西

沈嗣貞一首

嗣貞字紀常秀水縣學生有荀草堂集

譚梁生云紀常諸體俱臻典雅

秋夜

適館聞衙鼓歸家聽寺鐘欲為僧苦寂未作吏先慵夜永蘭膏滅秋深玉露濃此中忘去住城市有高蹤

李肇亨 三首

肇亨字會嘉嘉興人太僕日華子有寫山樓率
圃夢餘諸草

詩話吾鄉鮮巖壑之勝然園亭之參錯水木之明瑟舟楫之沿河縱游
覽所如而不倦萬曆以來承平日久士大夫留意圖書討論藏弄以文
會友對酒當歌鴛社之集譚梁生偕會嘉和之後賦詩者三十三人
事未百年而間閭故老已莫能舉其姓氏玉杯錦席之地皆化為宿草
荒烟惟李氏寫山一樓尚未椒飛粉落宛
然靈光之在魯錄珂雪之作不禁慨然

秋興

溪樓閒眺望秋思滿林塘潦水茨菇爛西風穰稷香晴
光翻去鳥野色動寒螿問詢東籬菊還須後夜霜

題宋人江泊圖

愛見江邊樹蕭疎落照前遠峰分霽色小塢共寒烟鴈

迹留沙渚猿聲到客船十年湖海夢今日倍依然

西泠寓室

露氣橫疎柳香風送晚荷不知湖面闊止覺四山多

駱雲程 二首

雲程字天游一名雨禾字穉孫嘉興人有廣禽
言

布穀

脫却破袴衣著新莫著故新人紈綺舊荆布貴易交富
易婦朝還朝暮還暮人生肯繫如匏瓠

鳳皇

節節足足雌鳴雄續不集于梧不集于竹栖棘斯危在

日言卷七十一
十五
效則辱雄宁雌宁何德之衰宁

譚貞和一首

貞和字閭仲嘉興人贈太僕卿昌言次子
社集分賦得金谷

日月長麗矚溪山餘素期別廬欣賞間更復賓主宜監
軍曠高懷祭酒澹塵思盤礴澗道上澗冽荇參差竹柏
既峭倩藥草復繁滋觥飛壘交錯絃急管威夷迢迢錦
步障晃晃珊瑚枝姬侍列雲屏倡舞喧相追豪侈極人
目俱言此會稀席終方奏序興往各稱詩遺韻珍當年
勝游示來茲不負歲寒約意氣歡足持

譚貞竑一首

貞竑字立生貞和貞良之弟有清音閣詩草

南屏歸艇遇雨

望裏南宮潑墨山小牕殘燭放舟還從容畢竟輸漁父
藕葉菱花泊淺灣

秦徵蘭八首

徵蘭字楚芳嘗熟儒學生

徐大臨云近傳天啓宮詞百首乃琴川秦秀才辭而回理陳踪

攘為已作公然鏤版行之

詩話德陵實錄為黑頭爰立者所攬天啓四年七年事遂爾遺佚秦秀才宮詞摭撫禁庭瑣語頗稱詳核第合而觀之嫌其述客魏居多而事關德陵者寡不無微憾耳

天啓宮詞八首

紅粉排班玉輦旁西園花柳踏春陽中宮侍從偏無幾

窄袖高鬟一樣妝

自注張后性淡靜愛憎稍與眾異客氏教宮人效江南作廣袖低髻尤為后所厭薄春秋佳日駕幸西苑等處

坤寧宮侍從多不踰三四十輩其妝束如圖畫所見古人像客氏往往目笑之

石梁深處夜迷藏霧露溟濛護月光捉得御衣旋放手

名花飛出袖中香

自注乾清宮丹陛下有老虎洞不知所始洞背為御街洞中甃石成壁可通往來上嘗于月夕率內侍賭迷藏

為戲潛避其內諸花香氣上所薦愛時采一二種貯襟袖間故聖駕數武外輒識之以芳芬襲人也

內河環遶禁城邊疏鑿清瀾勝昔年好是南風吹薄暮

藕花香拂白鷗眠

自注神廟靜攝年久紫禁城內河壅淤不通德陵復令疏浚之春夏之交景物尤勝禽魚菱藕儼若江南

聖主多能絕代姿罷朝常是運斤時裕妃笑指燈屏問

雕到寒梅第幾枝

自注裕妃未罹禍時宸眷獨寵上好雕鏤木器護燈小屏八幅手刻寒雀爭梅戲畀諸少璫令甯之仍諭以御

制之物價須一萬翌日如數奏進大悅

瑠璃波面浴鷗鳧艇子飛來似画图認著君王親蕩槳

滿隄紅粉笑相呼

自注上數偕中官汎葉舟于西苑手操篙櫓去來便捷

美人看黛月同彎侍駕登高薄暮還共訝洛陽橋下曲

年年聲遶兔兒山

自注兔兒山即旋磨臺乙丑登高聖駕臨幸鐘鼓司掌印官執板唱洛陽橋記攢省黛鎖不開一闕次年復如

之宮人知書者相顧疑怪非特於景物無取語意實近不祥也不期月而鼎湖龍逝矣

風掠輕舟霧不開錦鱗吹裂綵繡摧須臾一片歡聲動

捧出真龍水面來

自注乙丑端午駕幸西苑用綵繒飾小舟首尾為龍形上手持划具同少璫劉思源高永壽蕩漾橋北怪風忽

起雲霧四塞舟覆二璫湔死管事譚敬甫匍赴救扶駕出水

冰鴨銀苗院院同鵲橋衣卸巧山空晚涼供罷波羅蜜

去看河燈萬點紅

自注七夕節各宮立乞巧山子宮眷衣鵲橋補自初一

夕煮熟凝成膏者甜食房進供佛波羅蜜西苑作法事放河燈已上數條宮中舊例惟宮人內官深夜相攜看河燈則辛酉後事也

吳天泰 二首

天泰字謚生秀水人歲貢生有星帶草堂集

示族子

人生各分定如面異黔哲讀書求仕宦運數杳莫測不
如事田廩勤苦但食力我家本清門中葉浸流失相將
習游閒遂乃離樸質流覽五服遙頗喜見諸姪水國采
菱魚陸海種稭秫上可奉高堂俯足寧家室少游嘗有
言款段與下澤鄉里稱善人庶幾念祖德

題周仲吉画

雪色滿天地扁舟傍深谷危峰入層雲幽意動遐矚溪
橋凍未澌老鶴立寒木

吳麟玉一首

麟玉字稚禎別號雪翁秀水縣學生有醉月聽

溪二軒詩藁

邨居

屏跡市廛外烟邨聊索居貧無乞米帖嬾有絕交書松
下近調鶴雨餘新種魚更添數竿竹遮却往來車

徐淮一首

淮字愛竹嘉興縣學生有愛竹軒詩

宿金粟寺

昨歲曾游此莓牆墨尚新雨花長似粟觀海更無津下
榻便行客烹茶費主人時查孝廉寓此讀書年來稀戰伐鼙鼓但迎

神鼓係孫權所留

徐仲選 一首

仲選字華海一字鶴友海鹽人國子監生有鶴友詩藁

詩話鶴友近體
刻意學陸務觀

水邨

照檻晴光眼未迷瘦藤斜影度橋西沙頭白鴨黃鵝睡
籬畔瓜棚豆架低屋似魚船疎荻繞亭如僧笠稚松齊
此鄉風景真堪戀只合攜鉞坐菜畦

嚴紹宗 一首

紹宗字隨翁無錫人有鳩緣集

新秋廷鳴移具小樓待月

秋至杳無跡颯然風滿林倚樓羈客思呼殘故人心紅
葉疎簾冷青蘋小院深月明今共賦心事兩浮沉

曾元良 一首

元良字君山秀水人有烟波集

秋柳

俄驚搖落渭城邊悵望遙隄絕可憐病葉幾能禁驟雨
柔條猶自鎖寒烟從教歌院頻翻譜忍見郵亭更折鞭
淒斷新霜板橋曲衰荷相伴曉風天

高秉藻 二首

秉藻字友葵松江華亭人縣學生有潤照堂詩

湖堤

舍館意未安游覽力已猛披衣出芳原蒼翠周四屏琳
宮千百尺截窠吞顥景蘭若非一居鱗次若萬井旋窺
大佛寺却失龍象整其陽枕江濤其陰負修嶺步步異
前蹤行行惜去境斷橋曾不斷石堤相與永綠柳何歲
蕤間之桃與杏柔颺翦綺縠密葉含藻荇羣秀欣有託
萬象紛然炳歎息蘇長公千載若俄頃江山不改舊風
月誰爲領撫景念往昔令人發深省

淨慈寺

維艸綠楊岸爰命理輕策從者四五人鈎衣防亂石南
屏鬱岌堯琳宮寄翠嶺柱礎錯互置枕栱向背出檻鳳
威羽翔幢龍鱗甲拆法象有三身應真計五百伊昔壽
禪師于此布法席言詮雖已繁圓鏡乃歸一我來祇樹
下髣髴天竺國碧篠吐笙簧青松韻琴瑟口分茵陳飯
手展貝多帙逆風發梅檀香氣何秘醇非無豪士豪爲
憚律僧律徒倚澹忘歸山空落紅日

沈文輝一首

文輝字履亨嘉興縣學生有瓜田遺橐

西莊

乍喜人烟別都無俗客喧漸能諳稼穡不復厭雞豚
徑苔梅古疎籬竹屋存東塍近僧院清磬報黃昏

繆師伋一首

師伋字孟思嘉興人

九日

黃菊東籬下還逢九日開今朝尊酒盡無復白衣來周

士云
調合

顧玘徵 一首

玘徵字文玉嘉興縣學生有讀書臺橐

感舊

烏衣門巷舊游非王謝堂前燕子稀有客有客莫遑處
式微式微胡不歸乾坤萬里愁雲合風雨三秋落葉飛
極目天涯誰與語釣篷思老一魚磯

嚴 焯 二首

焯字子尹嘗熟人有南虞小草

詩話子尹詩律頗細如詠雪云竹上有聲如雨夜庭
中無月亦明時令永嘉四靈見之定把臂入林也

長相思

長相思在夢中自君之出羅幃空牕前淅淅來朔風滿
天霜雪鳴孤鴻楓林青兮關塞黑終然萬里魂難通長
相思何時終

初夏偕顧魏二子游西關

散步西郊任所之雨餘新綠倍濃時同游此日還同散
明日分飛各不知

曹 臣 一首

臣字野臣歙人有鬼訂集

野臣詩冥搜苦索不
由康莊轉入僻徑自定其集曰

鬼訂以為非
時人所知也

郝公琰墓下作

郝之壘今已矣憶君棄我已三年一棺裏骨黃泉裏我
欲呼君君不起慘柏悲松聲聒耳幾莖瘦草不成叢是
我頻來淚澆死

湯傳楹 二首

傳楹字子輔更字卿謀吳縣學生有湘中草

倚樓

天影一何澹空庭無雜喧暮山隨靄沒黃葉帶鴉翻無
徑不秋草與鄰同小園偶然搔首處竟夕未能言

渡口別

一水盈盈便渺然夕陽搖落渡頭船長堤燈火人歸後

回首西樓盡暮烟

馮元仲 一首

元仲字次牧慈谿人有天益山房詩集

題晏長侍祠

嗚呼晏長侍石室存道統上像皇帝三其左周召孔宋
之四大儒一一接其踵莪莪殿三楹像皆刻石奉四壁
龕者五分標五經總古人所未聞此是我作備倚彼何
人斯卓哉儒者勇

詩話都城西山弘教寺傳是正德間中貴晏忠所造寺前有澗過澗壘
石為門題曰道統門石殿三楹上琢三皇五帝三王像左鑿周召孔
諸聖賢右鑿周程張朱諸儒像別一石龕以藏五經殿外一石亭壁列
鐘簾千戚錢鏞弁裳之屬左龍馬馬毛旋五十五數具一如河圖右龜
龜甲四十五數具一如洛書東堂三楹壁列忠臣龍比以下孝子曾閔
以下若干人按元史泰定二年中書省言養給軍民必藉地利世祖建

日言然卷十一
大宣文弘教寺寺賜永業當時已號虛費今遺蹟已無可考觀晏公祠石象禮器制度渾朴不類明時匠人所鑿且元於儒釋初無所分疑寺即宣文弘教之遺址晏忠特從而修飾之爾金華姜給事應甲詩云空山石祠堂落穆跨深壑肖象古聖賢高下坐淵漠殿墀列龜龍如出自河洛煌煌先儒語所為忠孝作性理累百卷題壁見大略歷覽感吾心人傳晏公鑿厥志在尼山高邈得所託媿哉彼檀施費血塗丹牖則竟以為長侍所鑿次牧亦沿其誤至云古人所未聞此是我作俑不知祠字列聖賢像始於文翁踵於趙岐漢之遺碑若司隸校尉魯恭荊州刺史李剛從事掾武梁祠皆有刻石聖賢像非作俑比也

丁元公 一首

元公字原躬嘉興布衣晚為僧號願菴

詩話原躬負奇恒與俗齟齬書畫俱入逸品兼精繆篆詩亦不屑作庸熟語

題画木芙蓉

吹遍鯉魚江岸風露條霜蕊一叢叢謝家池上秋容一作空

闊十里長隄間白紅

喻應益 一首

應益字叔虞新建人

滕王閣

飛閣千年勝跡留層巒遠水檻中收萋萋岸綠王孫草
湛湛江平帝子洲煙樹尚含羅綺怨風濤不散管絃愁
飄零莫縱登高目門掩斜陽獨下樓

馮夢龍

夢龍字猶龍長洲人由貢生選授壽寧知縣有

七樂齋橐

詩話明府善為啓顏之辭間入打油之調雖不得為詩家然亦文苑之滑稽也

冬日湖邨即事

明詩綜卷七十一
兼葭一望路三叉
遙認莊窩去路斜
舟響小溪過蟹舍
屋頽高岸露牛車
輕霜隄柳餘疎葉
暖日邨桃早放花
平野蕭條聊極目
遠天寒影散羣鴉

明詩綜卷七十一

明詩綜卷七十二

小長蘆 朱彝尊 錄

虎林 汪泰來 緝評

張銓 一首

銓字宇衡沁水人萬曆甲辰進士除保定推官擢浙江道御史巡按江西再按遼東陣亡贈大理寺卿加贈兵部尚書諡忠烈有集

宜春臺眺望

臺以宜春勝登臨恰仲春
竹風如款客花氣欲熏人
山色平依檻江流曲抱城
昔賢棲隱處覽古倍含情

張振德 一首

振德字季修崑山人萬曆丙辰以選貢知興文
縣事天啓辛酉死奢崇明之難贈光祿卿謚烈
愍

魚兜堡

逃矣南荒地居然小有天魚兜沉夾浦龍洞閱靈泉耕
鑿番歌穩追呼羽檄連遠臣憂主辱未敢賦歸田

張可大 一首

可大字觀甫其先孝感人世襲南京羽林左衛
千戶中萬曆辛丑武進士歷官都督同知轉右
都督改南京左軍都督府管府事鎮登萊崇禎
壬申吳橋兵變回攻登州城陷自縊謚壯節

書邊事

無端小草出登壇壯士徒歌易水寒枉把全師輕一擲
遂令宿將盡三韓腐儒誤國由房琯野老吞聲恨賀蘭
豈是彼蒼開殺運祇因人事自摧殘

陸夢龍 一首

夢龍字君啓紹興山陰人萬曆庚戌進士除刑
部主事歷員外郎中出為廣西提學僉事轉江
西參議湖廣副使貴州參政廣東按察使降補
河南參議轉山東副使調陝西以參政分守固
原道崇禎癸酉戰死贈太僕寺卿謚忠烈

宿東林寺

禪房獨樹鳥爭棲月色冥濛霧漸迷曉起不知山路滑
西風吹雨過前谿

孫承宗

六首

承宗字稚繩高陽人萬曆甲辰賜進士第二除
編修歷坊局以禮部右侍郎掌詹事府拜兵部
尚書兼東閣大學士奉命督師出鎮山海加太
子太保尋加少傅兼太子太傅文華殿太學士
再加少師兼太子太師予告回籍崇禎二年仍
起督師又三年復予告歸七年高陽失守入城
南老營望闕拜叱持綬者縊死贈太傅諡文忠

有南陽集

錢受之云公生長北方游學都下負燕趙悲歌之節為
詩不問聲病不事粉澤卓犖沉塞元氣鬱盤 魏環極

云孫公古風近體靡不本英分據雄
才高步作者之林而充無泥於古

靜志居詩話先生自任天下之重盡瘁師中司馬之檄方馳樂羊之篋
已滿見危授命無媿全人集中三十五忠詩蓋有感於璫禍而作三十
五忠者趙尚書南星高總憲攀龍周侍郎炳謨楊副院璉馮副院從吾
何總督士晉左僉院光斗李御史應昇夏御史之令周中丞起元繆宮
諭昌期蘇考功繼歐張尚書問達汪侍郎輝丁簡討乾學鄧中丞漢素
御史化中吳總督用先顧憲副大章王尚書紀魏給事大中鄒總憲元
標王侍郎之寀周主事順昌夏文選蕩過周御史宗建周罔少朝瑞黃
御史尊素劉知府鐸萬郎中燦吳御史裕中張都事汶趙宗伯秉忠公
侍郎鼎孟參軍淑孔也東林之君子已得十八九焉先生之言曰起三
十五人于九京未必人人大有勳烈而有勳烈者必此三十五人痛惜
人才之
至矣

山海關

甲冑詩篇少乾坤戎馬多幻仍看海市壯擬挽天河塞
上人先老山頭月奈何羣雄驕語日一劔幾經過

潮

休嫁弄潮兒潮今亦失信乘我油壁車去向錢塘問
送友人
山城吹角月婆婆一派秋聲向客多已是愁中聽不得
那堪重唱渭城歌

閒圃

閒身終日比雲閒不爲秋風樓碧山却訝枝頭雙白鳥
夕陽飛倦未知還

秋日飲甯氏水亭

孤閣臨流混太清烟波渺渺抱重城西風莫卷枯荷盡
醉客重來聽雨聲

哭門人李元治

海內交游已漸稀眼前老友幾相依夜來驚有西園信
淚灑東風滿客衣

呂維祺 一首

維祺字介孺河南新安人萬曆癸丑進士除兗
州推官徵入爲吏部主事歷員外郎中告歸崇
禎初薦起尚寶卿改太常少卿進本寺卿提督
四尺館升南京戶部右侍郎兼都察院右僉都
御史總督糧儲進兵部尚書流賊陷潁州都督
趙世臣守清流關兵潰廷議多咎之奪職辛巳
洛陽陷被執不屈罵賊死事聞贈太子少保尋
謚忠節贈太傅

南庾即事

往事如譚虎先憂甚喘牛自煩前席召屢切北宸憂令
甲漕難截呼庚例始留徒薪君不信毋乃到焦頭

劉振之二首

振之字而強慈谿人崇禎庚午舉人署東陽儒
學教諭遷鄢陵知縣辛巳十二月城陷不屈為
賊支解贈太僕寺卿有画溪近草冰壺先生遺

橐

詩話先生初署廣文日以忠孝勉諸弟子題官舍之柱曰人熱難因吾
鼎可愛又曰一片冰心堪贈友滿腔熱血欲輸君其後捐軀最烈不食
其言

闕湖即事

秋容到處好碧水湛晴暉嶺樹陰逾密湖雲濕不飛亭
虛山易入野曠鵲忘歸戶外塵雖滿那能上芟衣

登青笑臺

樓陰倒映水潺潺簾卷空青鳥乍還一幅雲林難著筆
半沉半露霧中山

汪喬年一首

喬年字歲星遂安人天啓壬戌進士除刑部主
事累官兵部侍郎兼副都御史總督三邊死寇
難贈兵部尚書

商於懷古

路入商源萬壑回據鞍懷古思悠哉茹芝高士墳猶在

徒木姦雄骨已灰計絕楚援游客詐詩題秦嶺逐臣哀
古今得失俱陳迹惟有山花歲歲開

蔡道憲 二首

道憲字元白號江門晉江人崇禎丁丑進士除
大理推官改長沙癸未八月城陷被執不屈為
賊所磔事聞贈太僕少卿謚忠烈有悔後集

詩話江門自序悔後集云悔後者何前日妄作詩今而後悔也悔後而復有集者何吾但能焚前日之詩今日之作且輯之以竝後日之再悔也其虛懷可見詩雖音節未諧而清婉越俗如移竹已抽三尺筍種桃爭發一庭花又湘水清紫藤花落魚子生皆不失為佳句

送堵牧游入覲

十月迎君南千里送君北一歲雙酒厄隨君變顏色誰
能入長安便無故人憶下有洞庭上湘江為我留君不

可得我在南君在北夢相思見顏色他鄉飯君強食歌
再歌中歎息

歲暮

美人無信至歲暮江梅白家住嶺西東何處寄相憶

馮一第 一首

一第字根公長沙人天啓丁卯舉人崇禎癸未
長沙不守走湘鄉將乞師酉陽以圖殺賊為賊
所獲斷兩手置營中一夕死

野望

江岸閒行處晴雲澹一天微風生遠樹吹送渡頭船

蔡懋德 一首

明言錄卷十一
懋德字公虞崑山人萬曆己未進士除杭州推官入為禮部主事歷員外郎中升江西提學僉事轉浙江參政累官僉都御史巡撫山西太原城破自經于三立祠謚忠襄

月下步朱龍橋

長虹何夭矯獨跨萬山中一道來飛練千林壓冷楓歸雲奔遠岫涌月洗寒空攬袂登高立憑闌望莫窮

金毓峒 一首

毓峒字鶴沖保定人崇禎甲戌進士除中書舍人擢湖廣道御史監宣大軍尋奉命督禁旅扼畿南要害馳至保定登陴固守城陷投井死

早春雜詠

繫馬河濱及早春鳴鳩乳燕往來頻故園風景知何似自媿東西南北人

范景文

三首

景文字夢章吳橋人萬曆癸丑進士授東昌推官擢吏部主事歷員外郎中移疾歸起太常少卿尋以僉都御史巡撫河南升兵部侍郎轉南京都察院右都御史尋升南京兵部尚書坐劾時相除名為民已復起工部尚書拜東閣大學士京城陷拜闕號哭投井死初謚文貞順治初定謚文忠有冰餐堂草

夢章羸弱身不勝衣論詩顧曲每以江左風流自命一旦

持大議抗大節屹然與高陽定興竝峙崆峒戴斗為之生色陳
皇士云范公詩古直豪邁稜稜露爽遇國步艱難故多悽戾之辭
詩話啓禎之際秦聲變而至文天瑞楚調變而至尹宣子越吟變而至
王季重正音埽地矣吳橋博綜舊章領袖羣雅其詩發揚而不厲新警
而不佻獨自成家
不飲狂泉之水

有感

天啓嗣祚年臺諫氣色盛憂危叫九閭所恃上神聖何
來連斥逐無乃累新政薄謫亦主恩敢廢天子命所虞
端一開庶言疑欲屏中璫思乘墉况可授以柄於惟我
神皇高拱握金鏡稍稍視下輕釀成結轡病今誰秉國
成借之弄機竅罪人佚顯罰反憾言官諍漆室抱深懷
能不心恹恹尚慎一怒加撫茲萬邦正

宿長清署中有感作

古驛昏鴉坐長塗病馬饑宵寒停柝早時亟啓關遲落
月三更信春風六日期年年行役苦兩度已於斯

過維揚

游子關情處江空白露秋客程初問水旅思怯登樓非
是瞻雲切還應見月愁鄉關歸夢裏一夜下揚州

倪元璐一首

元璐字玉汝號鴻寶上虞人天啓壬戌進士改
庶吉士授編修歷侍講南京國子監司業右中
允左諭德右庶子國子監祭酒升兵部右侍郎
改戶部尚書兼禮部尚書翰林院學士京師陷
自縊死初謚文正定謚文貞有憶草

詩話曆日之頒明太祖定於九月之朔其後改十一月朔繼又改十月朔遂爲定制是日帝御殿比于大朝會士民拜于廷者例俱得賜倪尚書天啓中賦頌律詩最爲典重他詩過於新奇不然也尚書晚築室于紹興府城南隅牕檻法式皆手自繪畫巧匠見之束手旣成始歎其精工時方患目疾取程君房方于魯所製墨塗壁默坐其中堂東飛閣三層扁曰衣雲凭闌則萬壑千巖皆在焉下適石齋黃公至越施以錦帷張燈四照黃公不怡謂國步多艱吾輩不宜宴樂尚書笑曰會與公訣爾旣北行遂殉寇難閣順治初尚存曩嘗攜舍弟千里暇輒登焉今已鞠爲荒草矣

皇極門頒曆作

鳳闕開彤旭猊爐散紫烟六階齊度緯七政轉璣璿甲曆龍躔改寅賓象魏懸明時功在革資始義承乾黑帝威初試青皇位早傳周官新月令甘氏舊星篇人繼羲和後書成莫莢前庚先三日戒貞下一元旋圖籙符垂赤干支德應玄興王惟省歲太史又編年賜出黃星曜披看綠字鮮因知天曆數如日起虞淵

孟兆祥

一首

兆祥字允吉交河人天啓壬戌進士除大理評事升吏部主事歷郎中謫行人司副尋遷光祿寺丞轉少卿左通政大僕卿通政使官至刑部右侍郎甲申三月守正陽門城陷不屈死贈尚書初謚忠貞定謚忠端

詩話孟公峻節自樹取忤中璫卒殉節于正陽門子章明顯之以進士觀政吏部視公殮畢亦自盡時論翕然以爲三百年特見之事初贈河南道御史謚節愍順治九年定謚忠僖其詩文惜無存

硤石

硤石分秦險郵亭日欲低未知山近遠已失路東西遠

水看烟起深林畏鳥啼鳳城何處是彌望草萋萋

凌義渠 一首

義渠字駿甫烏程人天啓乙丑進士除行人選授禮科給事中歷兵科都給事中升福建右參政轉湖廣按察使山東右布政使入為大理寺卿京師陷自經初謚忠清定謚忠介有使岷臺

詩話凌公詩義見者解頤嘗與閔文學元京共排續湘烟錄董上舍斯張稱其冷豔畢臚比之吳均入東記及官禮垣封事四十餘上皆切中時弊溫輔以吏才稱之轉外溫既謝政入為大理臨難之頃從容就義惟悉取平生撰述焚之為可惜也公清介特甚田廬一無所遺身後二十餘年猶未井椽江都吳綺園次守吳興時夫人閔尚存園次肅拜堂下秋深矣尚衣葛衣練裙退而歎息恒以盪鼓魚菽遺之且卜地葬公于驪邨之北為文祭之

鄴中詩

微風入樹冷修修漳水依然咽舊流何處高樓思落月
久傳疑冢有荒丘佳人南國經春鎖公子西園愛夜游
最是英雄多感慨當歌今日好銷憂

施邦曜 一首

邦曜字爾韜餘姚人萬曆己未進士武學教授遷國子監博士歷工部主事員外郎中出知漳州府升福建參政轉四川按察使福建右布政使南京光祿寺卿擢左副都御史殉國難初謚忠介定謚恭愍

詩話浙人不幸萬曆以來執政者前有四明後有烏程德清以是朝士不附東林者槩目之曰浙黨此指一時阿比執政者而言則可爾東林諸君子全倚浙人助之人品蓋棺論定試觀建文壬午崇禎甲申殺身成仁潔己自靖者惟浙為多順治九年定謚甲申殉難文臣計二十人

而浙居其六繼此授命者更難悉數浙黨之目庶幾可以一洒矣恭愍
從容自經書其案云慙無半策匡時難唯有孤忠報國恩蓋初不以詩
名而自
饒方格

暮望

返照開西峽穿林度遠塘
翠枝散高影遠岫駐餘光
城市歸人急江天宿鳥忙
自傷遲暮客日日送殘陽

馬世奇

三首

世奇字君常無錫人崇禎辛未進士改庶吉士
授編修累遷左春坊左諭德兼翰林院侍講甲

申京師陷自經死初謚文忠定謚文肅有集

陳皇

士云公詩春容穠麗居然唐人風格

詩話馬公清德奉使諸藩餽贈一無所受比還朝夢中吟文信國詩從今別却江南日化作啼鶉帶血歸蓋殉國之志已素定故先兆于夢云

秦淮曲

萬騎南巡正德年內家前隊鐵連錢
白衣舞罷乘鸞去應有霓裳曲未傳

贈曹元宰守漳州

靈查秋泛海天涼五夜心懸燕寢香
總為至尊憂社稷漢臣何必薄淮陽

贈鄭少府之任

宦薄無妨吏隱尊清風一拂百年存
流移滿目誰堪繪念爾監門舊子孫

周鳳翔

一首

鳳翔字儀伯紹興山陰人崇禎戊辰進士改庶

吉士授編修遷南京國子司業歷左春坊左諭
德兼翰林院侍讀都城陷自經死贈禮部右侍

郎初謚文節定謚文介有集

陳皇士云公詩清麗
無館閣穠重之習

詩話甲申三月之變文介授命獨遲十九日城陷語吳莊介云臣于義
在必死然必一視大行殯宮縞素慟哭方可無憾爾二十一日赴東華
門茶棚下舉哀復匍匐至邸自經絕命詩云碧血九原依聖主白頭二
老哭忠魂時親猶具慶也於時大學士宜城丘公瑜集議朝房俄而賊
入亟走民家自縊為芻人所持不死次日賊蹤跡得之挾入窩舖求死
不得賊帥劉宗敏刑辱備加猶慢罵不屈伺守者稍懈乃就縊論者責
其濡忍至受羣盜之侮不得與忠臣之列文介東華之哭既不受賊帥
之拘而萬舌一辭免腐儒吹疵之論是天所以成公大節而公之素行
交孚于鄉國故
也不其難哉

舟中聞鴈

一葦秋橫渡三江鴈引羣北來應幾日消息可相聞
嘹唳孤雲迴蕭疎夜色分當前渾欲訴木葉落紛紛

劉理順一首

理順字湛六杞縣人崇禎甲戌賜進士第一授
修撰升左中允甲申殉國難初謚文正定謚文

烈有劉文烈公集

陳皇士云考宋元以來狀元及第死事者
於宋得三人何臬文天祥陳文龍於元得

三人李黼秦不華李齊而明有五人靖難之時則有黃侍中觀土木之
禍則有曹文忠鼎北京之變則有劉公而浙東有余庶子煌江右有劉
中允同升先後皆死國事此亦
科名人物之盛軼於前代者也

詩話劉公退朝賊騎猝入回寓舍書曰成仁取義孔孟所傳信公踐之
吾何不然暨其妻妾並縊可謂不負科名矣詩多直抒胸臆不為體格
所

錢塘江遇雨

微雨來江上濛濛曉未收故園千里隔客夢一身浮
烏白家家樹魚榔岸岸舟觀濤無不可須上幾重樓

吳麟徵 一首

麟徵字來皇號磊齋海鹽人天啓壬戌進士除
建昌府推官丁憂起補興化徵拜吏科給事中
歷都給事中升太嘗寺少卿京師陷自縊初謚
忠節定謚貞肅有集

詩話磊齋在八舍知無不言又明於當世之務不茹不吐奈與執政齟齬不用其謀嘗與伯兄石匏書云朝廷之是非臧否無恒而所號為正人專以門戶聲氣為事疆場事日益決裂安之若固然惟一人焦勞於上而已又云近日用人倏更倏換當事全無確見惟覘上意所在其餘議論紛紜封疆事所以日壞良可歎也又云宜興敗後大獄頻興士大夫幾無生氣而言路更甚弟幸免風波然欲積誠以冀匡救之萬一則未可得也又云闖賊破潼關直抵西安秦督三萬師一潰無餘獻賊破長沙進逼袁州江浙震鄰吾鄉恐未能安枕天下事有不忍言者子姪輩教以敦厚毋事浮文為善于鄉黨足矣其言一一切中時弊臨終處置家事各有條理從容不亂尤人情之所難能詩不甚敦琢其工者每涉傷時存其二首吉人之言不在多也

送王昆華前輩使節歸省由楚入滇

益部占星信桐圭展萼親水滌湘畹碧山入點蒼新休
沐西南里諮諏遠近人潘輿聞送喜日望使車塵

李子德云全首

清穩

走筆招友人飲

玄亭今在否竹馬舊過尋尚憶人如玉那禁雪滿簪平
湖秋水闊板屋夜燈深莫更疎還往相看歲暮心

送葛無奇侍御按粵

刺桐花發粵山青一路爭看豸繡經迴鴈峰南望天北
五雲長傍使臣星

汪偉 一首

偉字叔度江寧籍休寧人崇禎戊辰進士除慈谿知縣選授翰林簡討甲申三月死國難贈詹事府詹事初謚文烈定謚文毅

旅次述懷

于役逢蕭序停鞍已夕春酒餘忘逆旅湖外憶高蹤挂壁留殘火披衣候曉鐘故園今漸近白岳有雲封

沈山子云大曆

十子遺響

吳甘來一首

甘來字節之瑞州新昌人崇禎戊辰進士授中書舍人擢刑科給事中歷戶科都給事中甲申死寇難初謚忠節定謚莊介

詩話思陵死社稷周文介欲哭殯宮而後死莊介口然其言而亟歸寫自縊時因哭殯宮而受榜辱者蓋不止丘輔一人是則莊介之識遠也甲申之變諫垣數一人或竄或辱或汙偽命死節者僅莊介一人假踐文介之言安知不與丘輔同其辱乎君子論吳周兩公之死則先時者得其正矣

經彭澤

亦有東籬菊何人尚隱居夕陽催進艇殘夜擬焚魚物變看多異名高謫未除懷歸無長物猶有一牀書

許直一首

直字若魯如皋人崇禎甲戌進士除義烏知縣以母喪歸補惠來選授吏部主事歷員外甲申三月死國難贈太僕卿初謚忠節定謚忠愍

絕筆

投筆翻然辭世行老親幼子隔幽明丹心未雪生前恨
青簡空留身後名

王章 二首

章字漢臣武進人崇禎戊辰進士除諸暨知縣
調鄞縣徵授工部主事選陝西道御史以憂歸
服闋補河南道御史京城陷死之初謚忠烈定
謚節愍有公餘草

詩話王公赴義最烈公餘草詩一卷序者以吉光一片喻之是年御史
盡節者三人公與鄞陳公良謨零陵陳公純德也聞有昆明趙謨字鎮
所天啓甲子舉人除貴州龍泉知縣以禦土寇功行取擢四川道御史
巡視中城城陷爲賊所械瞋目大罵賊刀仗齊下殺於白帽衛衛其死
與王公相類而遠方乙科無人爲之請卹國史野
紀闕焉僅見於陳氏兩朝遺詩小傳特附書之

聖駕閱城

秋色當樓滿崇闈奠帝居虎門橫雉堞鳳吹導龍輿峻
坂雲臨近封泉地絡舒翠華迴輦處嵩舞遍丹除

讀書篁川偶詠

竹裏起茶烟白雲堆滿屋何處桔槔聲園丁灌花木

成德 一首

德字元修懷柔籍霍州人崇禎辛未進士榜姓
張有旨復姓除知滋陽縣事被逮杖謫久而赦
還補如皋知縣入爲兵部主事轉員外郎甲申
殉國難贈大理寺卿初謚忠毅定謚介愍

詩話元修牽絲作令不善事上官爲守所揭巡按以貪酷聞被逮按臣
及守溫輔私人也元修母張具本聲寃於朝隨溫輔肩輿詬罵溫輔恚
甚言於思陵杖之午門前下錦衣衛獄發遣時留家人居順義城破衆
爭匿地窖中元修父文桂曰豈可男女雜入一窟中乎賊至遂遇害一

妹二妾皆自經及甲申就義母張暨一妹一妾亦俱縊焉絕句一首蓋謫戍日太行道中作也

絕句

出山已定盟心語作令須思遣戍時但卷琴書賦歸去
莫因狗祿乞身遲

金鉉一首

鉉字伯玉留守前衛籍武進人崇禎戊辰進士
選揚州府學教授入為國子監博士升工部主
事尋改兵部甲申殉國難初謚忠節定謚忠潔
有集

詩話思陵之去闡黨無異拔山曾不數年命張彝憲總理戶工二部錢糧出帑金別建公廨俾諸司以屬吏之禮見金公再疏陳其不可謂以陛下迪簡之臣而令其罄折偃僕於刑餘之子不亦羞朝廷而辱當世之士邪思陵卒不允也中官借驗火器劾公落職公笑曰吾去官遠此

輩如脫蟻蝨垢膩之衣豈不愉快遂與諸弟講古文辭尤精研易理壬午七月晦讀邵氏書題其後曰甲申之春定我進退進雖遇時外而弗內退若苦衷遠而弗滯外止三時遠不卒歲優哉游哉庶畢吾世又語其弟曰吾平生寡所好視弃官如揮涕唾今以巡城每過御河輒留連不能去何也卒沉於是從彭咸之所居公志蓋已先定矣

拜文信國祠下

復始自天運臣道無終窮殉節士所恒寧足矜子功偉
哉一文士毅然任即戎棘行若履坦所在吟淒風一息
苟可奮安忍即瘖聾九死固所甘但惜炎運終堪嗟生
祭者不足語微衷

申佳胤一首

佳胤字孔嘉永年人崇禎辛未進士除儀封知
縣擢吏部主事轉員外降南京國子監博士遷

大理寺副升太僕寺丞都城陷投井死初謚節愍定謚端愍有君子亭集

詩話申公循吏治最中州及考牧近畿聞寇逼居庸郡縣望風奔潰或勸毋入都慷慨流涕曰固知京師不支如天子孤立何疾馳以入時三月十二日也徧謁大臣畫戰守策皆不省城陷自投王恭殿井中其詩娟秀不蹶不浮近劉半舫一派

贈郭子

下榻留征騎燒燈共客吟萬金烽火信一夜故園心世事風塵老交情契闊深此行須鄭重兵氣滿山岑

王與睂 二首

與睂字永錫一字百斯濟南新城人崇禎戊辰進士改庶吉士授湖廣道御史巡視河東鹽課陝西茶馬應天學政引疾歸甲申四月聞京師

陷暨妻子登樓齊縊死有隴首集

陳伯璣云侍御以建言忤執政蕭然

歸里聞難之日不以在野緩須臾之死即其短歎微吟已可知其嚴氣正性 紀伯紫云先生忠孝大節日月爭光詩集僅存猶足挾風霜而鏗金石

詩話新城王氏科第最盛盡節死者亦最多崇禎五年吳橋兵變南趨時則保定同知象復暨其子舉人與夔死焉十五年城再破時則貢生與朋暨其子舉人士熊生員士雅死焉至是侍御暨妻子孺人子士和又死焉王氏之門才甲一世矣

對鉗梅作

鄉思那可禁况復逢驛使念我欲歸時已結垂垂子

西羌雜詩

紇干山下少人過大將行師按突何袖裏尚餘三尺練歸來生繫角斯囉

王士和 一首

士和字允協御史與眉子新城儒學生

詩話允協死不違親與孟忠信比烈其妻於崇禎壬午城破時先自經忠臣孝子烈婦萃於一門尤難得也

絕命詞

痛余生之不辰兮天滅我之立王我父母一聞之涕
滂沱以彷徨以身殉國難子維千古之臣綱嗟反面而
事讎子方臣妾之未遑哀世溷濁兮四維不張大地無
容身之隙子願隨我父母歸于帝鄉

許琰一首

琰字玉重長洲縣學生贈五經博士

詩話玉重青衿未受一命無必死之義而忠憤奮發始縊于家隨縊于福濟觀皆為人救解復投胥門城壕時潞王舟泊城下遙望見之亟命水夫掖起抵家聞哀詔至宛轉悲號賦詩有一箇書生難殺賊願為厲鬼效微忠之句絕粒七日而歿先玉重死者北京布衣贈中書舍人湯

文瓊聞帝崩煤山書衣帶云位非文丞相之位心則文丞相之心慷慨自歿又聞金陵有丐者聞北京變搏膺大哭赴百川橋下死謝康樂詩所云本自江海人忠義感君子是也

妾薄命

妾本名家子幼小受人憐感君明珠贈含羞意不前左
手執書策右手揮鳴絃皎皎明月光苦憶嘗纏繇恩情
恨不久韶華無盡年忍作待嫁衣甘為他人妍君故未
相知妾意殊不然有聲當徹天有淚當徹泉待醒深閨
裏風光寧久懸

土行儉一首

行儉字質行宜興人崇禎丁丑進士授南京戶部主事歷郎中出知荊州府改重慶甲申六月

死寇難

詩話張獻忠奪佛圖關用火具攻重慶時漢中已破瑞王來奔關南道陳繻及隴右士大夫挈家從之城既陷賊俘巡撫陳士奇知巴縣事王錫暨太守王公縛之演武場將殺之俄而雷電晦冥獻忠對天詬曰我殺人與天何涉架飛礮向天齊擊之既霽諸公皆遇害事載婁東沈荀蔚蜀難紀略

軍中口號寄諸弟

重關烽火陣雲寒回首鄉園道路難
忽憶高堂清淚落還將尺素報平安

沈雲祚 一首

雲祚字予凌太倉人崇禎庚辰進士除華陽知縣甲申死寇難有侶郊居存橐

塗中悼亡

一水東歸百里津每逢風雨便傷神
而今帷帳辭秦淑誰憶江邊行人

尹伸 三首

伸字子求宜賓人萬曆戊戌進士授承天推官入為兵部主事歷員外郎中出知西安府致仕起補陝西按察副使歷河南左布政使尋遷太嘗卿張獻忠陷成都被執罵賊見殺

得黔報寄示兩子

仕宦通黔籍時比於放流頃者因戎馬反名才見收我
昨權出處曾慮當見投未即援奔林已同鷹在鞴衰年
履瘴鄉病軀親戈矛中子不樂聞况使老妻憂惟余性

頗達死生同一漚炙額兼噴鼻壯夫昔所羞苟能了二
觀未必無一籌世法今頗解勉師老氏柔冠軍當辦戰
都護或深謀聲靈仗英主小醜何足劉虔勤奉簡書功
利不敢求畸人儻天幸為我營菟裘

敘南曲 二首

七星歷歷面烟鬢千佛巖頭翠岫班水合雙江波浪闊
浮來塢影是東山

鎖江北渡入涪溪亂石叢篁路欲迷太史遺文殘碣上
武侯荒廟夕陽西

孫士美 一首

士美字公粲松江華亭人天啓辛酉舉人知深

州事崇禎戊寅十一月州城被圍力盡死于官

一門殉難者十有二人事聞贈太僕寺卿

守城作

鐵騎繞孤城烽煙勢未平君親本至性南北總關情地
下難熏鼠原頭絕救兵 一作此日魚書急何時鶴唳清 寄言青史筆莫載罪

臣名

王佐聖 一首

佐聖字克仲一字魯生長洲人萬曆壬子舉人
除知遵義縣事崇禎壬午城破死于難有緘菴

詩鈔

詩話明季用人專拘資格吏部除日乙科多投之遠方如張公季修王
公克仲劉公而強馮公櫻公殉節皆最烈豈惟千佛名經中人始可入

顯忠
錄邪

幽蘭篇送黃子羽應召入京

芳蘭生空谷託根何孤清恥與羣卉伍修然挺素莖日
月沐秀華雨露滋芳英一朝辭中阿以之植蓬瀛風姿
益娟妙紉佩當瑤瓊允矣王者香不隨蕭艾榮

蘇瓊一首

瓊字赤友石埭人崇禎甲戌進士除知景州移

瀘州張獻忠寇蜀死于難有青城先生詩略

淮陰釣臺

駐馬淮陰道王孫劇可憐已無諸母漂猶剩一臺偏試
問藏弓日何如把釣年我來倍惆悵片石立寒煙

吳爾燠 四首

爾燠字介子崇德人崇禎癸未進士改庶吉士
李自成陷京師從賊中脫歸依史可法軍死揚
州之難有滋蘭堂初集聶許堂遺草

詩話先生間道潛行依史閣部軍中以身許國遇鄉人祝孝廉湖南還
斷一指裏家書中遺其親誓不空返卒死於兵平居曾撰死臣傳目曰
仁書傳有小序各繫以古人曰湛身曰焚曰炮烙曰炙曰自剄曰不食
曰閉口曰雉經曰扼吭曰立槁曰沒陣曰觸曰墜曰鳩曰烹曰菹醢曰
轢曰斬曰車裂曰磔曰鋸曰囊撲曰剝曰剖曰拉曰杖曰笞曰鎚擊曰
刺曰幽曰凍曰疽發背曰慟哭統論之曰諸死者或假手於人或憤激
自裁或罵賊畢命身死主寤者有之身死敵懼者有之身死家破者有
之身死名榮者有之要與禽息鳥視者遠矣其曰被犀甲操吳戈氣之
雄騰天河驚廣野捐愛戚志之決頭匪恤我心赤我血碧長城雖壞白
虹貫日則先生自道也先生之死有故人殮其尸而寄棺於佛寺寺燬
於兵火棺亦燬焉其家函所寄指葬之四
明葛編修世振入之昭忠錄并銘其墓

我行其野 三章

我行其野石田嶙峋荒原黯澹夏不見人黃埃接天有
狐僂僂陰風吹車慮掣其輪

相彼征駒尚求果腹嗟我人斯終朝無祿螟螣之生不
遺荏粟哀哉鴈戶載行載哭

我丁匪辰紛此百罹寇訐于郊僉曰撫之惟愴人是咨
俾大璫是司我行其野告哀以詩

秋風辭

秋風颯颯兮切素肌華林摧謝兮蛩螿啼綺席陳兮清
歌闌美人去兮何當還羽蓋飛兮龍媒乘發激楚兮箭
韶鳴采三秀兮餐玉英思緜邈兮遐征歲華荏苒兮何
時平

明詩綜卷七十二

